

# ZAKON O IMUNITETU BOSNE I HERCEGOVINE

(Neslužbeni prečišćeni tekst)<sup>1</sup>

## Član 1.

### Cilj Zakona

Ovaj zakon se donosi s ciljem da se zaštiti integritet zakonodavnih i izvršnih institucija Bosne i Hercegovine putem utvrđivanja procedure prema kojoj se delegati i članovi Parlamentarne skupštine Bosne i Hercegovine mogu pozvati na imunitet od krivične ili građanske odgovornosti, a članovi Predsjedništva Bosne i Hercegovine kao i članovi Vijeća ministara Bosne i Hercegovine se mogu pozvati na imunitet od građanske odgovornosti.

## Član 2.

### Predmet i primjena Zakona

Ovim zakonom se utvrđuju osobe koje imaju pravo pozvati se na svoj imunitet u odbrani u krivičnom i parničnom postupku i propisuju se posebna pravila krivičnog i parničnog postupka po kojem su tužilaštva, sudovi, kao i drugi učesnici u krivičnom i parničnom postupku dužni postupati u skladu sa ovim zakonom. Ni jedna odredba ovog zakona neće na bilo koji način biti u suprotnosti sa postupcima ili nadležnošću Ustavnog suda Bosne i Hercegovine kako to predviđa član VI Ustava Bosne i Hercegovine.

## Član 3.

### Osobe koje imaju pravo na imunitet (isključenje od krivične i građanske odgovornosti)

Delegati Doma naroda i članovi Predstavničkog doma neće biti krivično ili građanski odgovorni za bilo koji postupak izvršen u okviru njihovih dužnosti u Parlamentarnoj skupštini Bosne i Hercegovine. Članovi Predsjedništva Bosne i Hercegovine i članovi Vijeća ministara Bosne i Hercegovine neće biti građanski odgovorni za bilo koji postupak izvršen u okviru njihovih dužnosti u Predsjedništvu BiH odnosno Vijeću ministara BiH.

---

<sup>1</sup>Ovaj neslužbeni prečišćeni tekst sadrži Zakon o imunitetu Bosne i Hercegovine ("Službeni glasnik BiH" broj 32/02) koji je donesen Odlukom Visokog predstavnika za Bosnu i Hercegovinu, dana 06. oktobra 2002. godine; Zakon o imunitetu Bosne i Hercegovine ("Službeni glasnik BiH" broj 37/03) kojim je potvrđena Odluka Visokog predstavnika; Zakon o izmjenama i dopunama Zakona o imunitetu Bosne i Hercegovine ("Službeni glasnik BiH" broj 75/09) – **označen podebljanim slovima.**

Ovaj prečišćeni tekst predstavlja neslužbenu verziju i na njega se ne može pozivati prilikom službene upotrebe.

## **Član 4.**

### **Trajanje i definicija imuniteta**

Na imunitet koji imaju, osobe iz člana 3. ovog zakona mogu se pozvati u bilo koje vrijeme za postupke izvršene u okviru njihovih dužnosti u navedenim institucijama, ali se on ne može smatrati općom preprekom za krivično gonjenje ili pokretanje parničnog postupka. U smislu ovog zakona, "postupci izvršeni u okviru njihovih dužnosti" podrazumijevaju postupke koji proističu iz dužnosti koju pojedinac ima u Parlamentarnoj skupštini, odnosno Predsjedništvu BiH ili Vijeću ministara BiH prema definiciji iz Ustava Bosne i Hercegovine.

## **Član 5.**

### **Važeći zakoni**

Osim ako nije drugačije predviđeno ovim zakonom, krivični i parnični postupak protiv osoba iz člana 3. ovog zakona vodi se prema važećem Zakonu o krivičnom i Zakonu o parničnom postupku.

## **Član 6.**

### **(Pozivanje na imunitet)**

**Ako u toku krivičnog postupka lice iz člana 3. stav 1. ovog Zakona izjavi da je postupak koji predstavlja osnov za pokretanje tog krivičnog postupka izvršen u okviru njegovih dužnosti prema definiciji iz člana 4. ovog Zakona, o ovom pitanju raspravljat će i donijeti odluku nadležni sud. Ako u toku parničnog postupka koji se vodi protiv lica iz člana 3. ovog zakona, lice izjavi da je postupak koji predstavlja osnov za pokretanje tog parničnog postupka izvršen u okviru njegovih dužnosti prema definiciji iz člana 4. ovog Zakona, o ovom pitanju raspravljat će i donijeti odluku nadležni sud. Lice koje se poziva na imunitet dužno je predložiti dokaze kojima se potvrđuje njegovo svojstvo iz člana 3. ovog Zakona.**

## **Član 7.**

### **(Nadležni sud)**

**Za odlučivanje o imunitetu u krivičnom i parničnom postupku nadležan je sud pred kojim se vodi postupak (u daljnjem tekstu: sud).**

## **Član 7a.**

### **(Procedure)**

**Lice koje ima pravo na imunitet može se na to pravo pozvati na zapisnik u toku postupka kod suda ili pisanim podneskom van ročišta. Sud je dužan zatražiti od prisutne**

**suprotne stranke da se izjasni o pravu stranke koja se pozvala na imunitet. Izjašnjenje se može podnijeti najkasnije u roku od tri dana. Ako suprotna stranka nije prisutna ročištu ili je pravo na imunitet istaknuto pisanim podneskom, sud će od suprotne stranke zatražiti da se o pravu stranke koja se pozvala na imunitet izjasni u roku od tri dana od dana prijema poziva za izjašnjenje.**

#### **Član 7b.**

**(Rok)**

**Lice koje ima pravo na imunitet može se na to pravo pozvati do završetka glavnog pretresa u krivičnom postupku i do zaključivanja glavne rasprave u parničnom postupku.**

#### **Član 7c.**

**(Donošenje odluke)**

**O pravu lica koje se pozvalo na imunitet odluku donosi vijeće od troje sudija u roku od tri dana od dana prijema izjašnjenja suprotne stranke, odnosno isteka roka za izjašnjenje. Protiv odluke iz stava 1. ovog člana može se u roku od tri dana od dana prijema izjaviti žalba sudu koji odlučuje u drugom stepenu o odlukama nadležnog suda. Drugostepeni sud dužan je donijeti odluku u roku od tri dana. Pravosnažna odluka bit će dostavljena Parlamentarnoj skupštini Bosne i Hercegovine, kao i organu u kojem lice obavlja dužnost.**

#### **Član 8.**

**Stavljanje van snage**

**Na dan stupanja na snagu ovoga zakona, Zakon o imunitetu ("Službeni glasnik BiH", br. 1/97 i 3/99) prestaje da važi, te se stavljaju van snage prethodne proceduralne zabrane krivičnog gonjenja ili pokretanja parničnog postupka protiv onih osoba koje su inače imale pravo na imunitet. Takvo stavljanje van snage ne prejudicira pravo na odbranu u krivičnim i parničnim postupcima koje je ranije regulirano zakonom.**

#### **Član 8a.**

**(Stavljanje van snage Pravilnika)**

**Stupanjem na snagu ovog Zakona prestaje važiti Pravilnik o nadležnosti i načinu rada sudova prilikom rješavanja pitanja imuniteta u krivičnom i parničnom postupku ("Službeni glasnik BiH", broj 22/08).**

## **Član 9.**

### **Stupanje na snagu i objavljivanje**

Ovaj zakon stupa na snagu odmah i bit će odmah objavljen u "Službenom glasniku BiH" i u službenim glasilima Federacije Bosne i Hercegovine, Republike Srpske i Brčko Distrikta Bosne i Hercegovine.

\*

**"Službeni glasnik BiH" broj 75/09**

## **Član 5.**

### **(Stupanje na snagu)**

**Ovaj Zakon stupa na snagu osmog dana od dana objavljivanja u "Službenom glasniku BiH".**